



**CONVENIO DE COLABORACIÓN ENTRE A AXENCIA PARA A
MODERNIZACIÓN TECNOLÓXICA DE GALICIA E A UNIVERSIDADE DE VIGO
NO MARCO DA CELEBRACIÓN DAS OITAVAS XORNADAS NACIONAIS DE
INVESTIGACIÓN EN CIBERSEGURIDADE (JNIC 23)**

Santiago de Compostela, 31 de marzo de 2023

REUNIDOS

Dunha parte, don Julián Cerviño Iglesia, director da Axencia para a Modernización Tecnolóxica de Galicia, actuando en nome e representación da dita axencia, en virtude das facultades conferidas polo Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, modificado polo Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico- Financeira e Contable (Cixtec) e se modifica o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, e o Decreto 149/2022 do 1 de setembro, (DOG núm.167 do 2 de setembro) polo que é nomeado director da Axencia.

Doutra parte, D. Joaquín Reigosa Roger, en calidade de Reitor Magnífico da Universidade de Vigo (UVIGO), actuando en nome e representación dela en virtude das facultades conferidas pola Lei orgánica 6/2001, de 21 de decembro, de Universidades, modificada pola Lei Orgánica 4/2007, do 12 de abril, e o Decreto 13/2019, de 24 de xaneiro, polo que se aproban os Estatutos da Universidade de Vigo, e o Decreto 110/2022, de 9 de xuño.

Interveñen en función dos seus respectivos cargos no exercicio das atribucións que teñen conferidas no nome das entidades que representan e

EXPOÑEN

Primeiro. Que, segundo o artigo 9 do estatuto da Axencia para a Modernización Tecnolóxica de Galicia aprobado polo Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (Cixtec) e se modifica o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, a Amtega ten entre as súas competencias a dirección e xestión de todas as actuacións da Xunta en materia de tecnoloxías da información e as comunicacións e o deseño e liderado de iniciativas que contribúan a impulsar o desenvolvemento da Sociedade da información en Galicia, garantindo os dereitos dos cidadáns e eliminando as barreiras que se opoñan á expansión e ao uso das novas tecnoloxías.

Así mesmo, de acordo co artigo 5 do Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os



seus estatutos, queda desconcentrado no titular da Dirección da Amtega a competencia para subscribir con entidades públicas e privadas, en nome da Amtega, convenios de colaboración excluídos da lexislación de contratos do sector público.

Segundo. Que o centro de investigaciónatlanTTic, pertencente á Universidade de Vigo, ten, entre os seus fins, cooperar no desenvolvemento científico e técnico, cultural e social na comunidade autónoma de Galicia, así como a difusión e a valoración e a transferencia do coñecemento ao servizo da ciencia, da técnica e da cultura, da calidade de vida e do desenvolvemento económico, promovendo o desenvolvemento tecnolóxico, a transferencia da tecnoloxía e a innovación como aplicación dos resultados da investigación, procurando a maior proxección social das súas actividades, mediante o establecemento de leitos de colaboración, convenios, contratos e estruturas que instrumenta a Lei Orgánica 6/2001, do 21 de decembro, de Universidades, modificada pola Lei Orgánica 4/2007, do 12 de abril, co fin de asistencia á sociedade, co obxecto de favorecer o progreso social, económico e cultural e contribuír á mellora do sistema educativo a través do fomento dos medios tecnolóxicos máis avanzados.

Terceiro. Que a Xunta de Galicia, ante o escenario dixital que nos rodea, motor dunha sociedade mellor, apostando por un modelo de crecemento vinculado á economía dixital –solidaria e inclusiva– e á transparencia e participación de todos os axentes implicados no desenvolvemento económico de Galicia, está a impulsar medidas dinamizadoras da economía galega. Neste contexto, o sector das TIC galego debe converterse nunha das áreas produtivas claves no desenvolvemento económico e social de Galicia, pola súa condición de acelerador do cambio tecnolóxico e polo seu carácter transversal ao resto de sectores, polo que a innovación e a investigación no dixital son consideradas clave.

O Consello da Xunta aprobou, o 3 de decembro de 2020, a Estratexia Galicia Dixital 2030, co obxectivo de configurar un futuro dixital para tod@s, contribuíndo ao aumento da calidade de vida e ao desenvolvemento sostible nas súas tres vertentes: económica, social e medio ambiental.

Así, a Estratexia Galicia Dixital 2030 constitúe unha folla de ruta para apoiar a toma de decisións no ámbito dixital na próxima década que, sobre as bases construídas, contribúa a extrapolar ideas das tendencias globais actuais, explorar algunhas das incertezas clave que darán forma ao futuro de Galicia, e anticipar mellor algunhas das eleccións e decisións que poderemos afrontar nos próximos anos.

Ademais, enmarcada dentro da Estratexia Galicia Dixita 2030 e aliñada coa Estratexia de Ciberseguridade da UE e a Estratexia Nacional de Ciberseguridade, particularizada para a comunidade galega, a Xunta de Galicia, a través da Amtega, está a desenvolver a Estratexia Galega de Ciberseguridade 2030, que engloba, dentro das súas liñas estratéxicas, impulsar a innovación, o desenvolvemento e a investigación aplicada á ciberseguridade.



Cuarto. A Amtega ten entre os seus obxectivos prioritarios lograr un desenvolvemento efectivo da Sociedade da Información na Comunidade Autónoma de Galicia, promovendo aquelas accións que faciliten e impulsen a incorporación de toda a sociedade aos novos recursos tecnolóxicos da información e das comunicacións e a implicación dos cidadáns galegos na utilización das novas tecnoloxías como factor xerador de novas capacidades, de emprego e de desenvolvemento económico. A velocidade de desenvolvemento da Sociedade do Coñecemento e as súas tecnoloxías esixe unha labor de concienciación e formación en materia de ciberseguridade coa finalidade de que os distintos colectivos estean preparados para facer fronte ás ameazas crecentes fronte ás actividades delitivas na rede.

Quinto. Que para levar a cabo a devandita finalidade a Amtega continúa co deseño e execución de actuacións de promoción, formación e concienciación en materia de ciberseguridade, entre as que estarían:

- Colaborar e cooperar con entidades galegas referentes no eido da ciberseguridade
- Promocionar, estar presente e participar en iniciativas de relevancia na comunidade galega que promulguen a posta en valor da ciberseguridade e a importancia da innovación e a investigación neste eido.

Sexto. Que a Universidade de Vigo, a través do centro de investigaciónatlanTTic, coorganizará, en colaboración con Gradient e o Instituto Nacional de Ciberseguridade, as oitavas Xornadas Nacionais de Investigación en Ciberseguridade (JNIC 23), coa finalidade de promover o desenvolvemento tecnolóxico, a transferencia da tecnoloxía e a innovación como aplicación dos resultados da investigación.

Sétimo. Que existe unha identidade entre as finalidades da Amtega e as Xornadas Nacionais de Investigación en Ciberseguridade (JNIC 23), polo que se considera axeitado articular colaboración entre a Amtega e atlanTTic mediante o presente acordo.

En consecuencia, a Amtega e a Universidade de Vigo acordan subscribir o presente convenio de colaboración con base nas seguintes:

CLÁUSULAS

Primeira. Obxecto

O obxecto deste convenio é establecer as condicións polas que se rexerá a colaboración entre a Amtega e a Universidade de Vigo na celebración de actividades que promulguen a posta en valor da ciberseguridade ante toda a comunidade galega, así como o impulso da innovación, o desenvolvemento e a investigación aplicada a este campo e, en concreto, na colaboración nas oitavas Xornadas Nacionais de Investigación en Ciberseguridade (JNIC 23), un congreso científico xa consolidado como referente nacional na materia tras as súas sete edicións realizadas, que teñen



como obxectivo fundamental favorecer que a comunidade científica nacional ao redor da ciberseguridade poida poñer en común os seus avances. A oitava edición das citadas xornadas celebrárase en Vigo, no mes de xuño de 2023, cunha duración estimada de 3 días.

Esta iniciativa de fomento do ecosistema da I+D+i nacional en ciberseguridade, está identificada no Plan Estratéxico da Rede de Excelencia Nacional de Investigación en Ciberseguridade; iniciativa que viña definida no Plan de Confianza Dixital (derivado da Axenda Dixital para España) como medida 25 e promovida por INCIBE.

Esta iniciativa será un evento atractivo para a industria da ciberseguridade e converterase nun vehículo para canalizar a transferencia de coñecemento entre Academia e Industria. Tamén pretende atraer aos usuarios finais demandantes de solucións de ciberseguridade, en especial á “demanda sofisticada” constituída por operadores de infraestruturas críticas, CERTS, Defensa ou FCSE, onde poidan expoñer as súas necesidades a modo de retos e analizar o estado da arte en materia de investigación en ciberseguridade. Ademais, estas xornadas resultarán de interese para estudantes e profesionais TIC que estean interesados en dedicarse á investigación en ciberseguridade.

A oitava edición das JNIC, constiúirá un foro científico activo e dinámico a nivel nacional que serve de punto de encontro para todos aqueles profesionais, especialmente académicos e investigadores, que traballan nos diferentes aspectos da ciberseguridade. O devandito foro centrarase en:

- Permitir a presentación de traballos de investigación orixinais.
- Permitir a posta en común de ideas en desenvolvemento.
- Permitir a posta en marcha de colaboracións entre investigadores de todo o territorio nacional, permitindo desenvolver proxectos ambiciosos.
- Orientar as JNIC cara á comunidade científica de investigadores en ciberseguridade.
- Facer das JNIC un punto de encontro para desenvolver ideas conxuntas entre os diversos grupos de investigación en ciberseguridade que existen a nivel nacional para crear propostas altamente competitivas en convocatorias de fondos de financiamento a nivel nacional, europeo e internacional.

Este convenio enmárcase dentro das accións definidas na Estratexia Galicia Dixital 2030 e a Estratexia Galega de Ciberseguridade 2030.

Segunda.- Obrigas das partes

As partes comprométense a colaborar coordinadamente, no ámbito das súas respectivas competencias, na execución das actuacións e medidas que resulten necesarias para o eficaz cumprimento do obxecto do presente convenio.

Un.- Compromisos da Amtega

A Amtega, ao abeiro do presente convenio, asume os seguintes compromisos:

1. Realizar a achega económica prevista na cláusula terceira deste convenio.



2. Colaborar activamente na promoción e difusión de todas as actuacións previstas no convenio, principalmente a través da páxina web da Amtega e do Nodo Galego de Ciberseguridade CIBER.gal, así como outras vías que se estimen oportunas
3. Colaborar activamente, de ser requirido poratlanTTic, no asesoramento relativo á organización das actividades obxecto deste convenio
4. Aplicar medidas antifraude eficaces e proporcionadas no seu ámbito de xestión e cumprir a normativa comunitaria, estatal e autonómica de aplicación.

Dous.- Obrigas da Universidade de Vigo

Co fin de garantir a execución do obxecto do presente convenio, a Universidade de Vigo, a través do centro de investigaciónatlanTTic, obrígase a:

1. Facilitar a correcta organización e realización das xornadas en asuntos loxísticos, de contido, de comunicación e difusión, despregando, no seu caso, os recursos que sexan precisos para a súa consecución.
2. Achegar o persoal preciso para lograr a adecuada organización das xornadas e a correcta planificación e execución das mesmas
3. Facer figurar explicitamente en todas as accións de difusión previas das actividades obxecto deste convenio, en comunicados oficiais, novas de prensa, así como na páxina web das xornadas e en todo o material promocional vinculado, o patrocinio, colaboración e apoio da Amtega e do Nodo Galego de Ciberseguridade CIBER.gal á celebración das xornadas
4. Incluír de xeito específico e visible o apoio da Amtega e do Nodo Galego de ciberseguridade no material de ambientación, tanto físico como dixital, que se empregue nas instalacións pertinentes os días de celebración das xornadas
5. Permitir a un representante designado pola Amtega, a intervención no acto de inauguración institucional das xornadas
6. Poñer no coñecemento da Amtega, as actualizacións e fitos relevantes referidos á organización das xornadas coa suficiente antelación para ser coñecedora das mesmas e poder prestar apoio na promoción e difusión
7. Remitir á Amtega, á finalización das xornadas, unha memoria ou informe de recompilación dos datos máis relevantes da celebración das xornadas, así como das accións onde se mencionou a colaboración e apoio da Amtega e do Nodo Galego de Ciberseguridade

Terceira.- Financiamento

1. O orzamento previsto para a realización do obxecto do presente convenio ascende a sesenta mil euros (60.000 €).
2. A Amtega colaborará na realización do obxecto do convenio cunha achega máxima de dez mil euros (10.000 €) con cargo á aplicación orzamentaria 07.A1.571A.640.0 dos orzamentos xerais da Comunidade Autónoma de Galicia para o ano 2023.
3. A cantidade achegada pola Amtega destinarase a cofinanciar os gastos relativos ás seguintes actuacións previstas:



- Medios técnicos para a adecuación e preparación dos espazos físicos no que se celebren as xornadas.
- Medios materiais tanto físicos como dixitais destinados á adaptación do lugar de celebración das xornadas.
- Persoal técnico e persoal auxiliar precisos para a realización das xornadas
- Servizos e elementos operativos precisos para a xestión das xornadas.
- Accións promocionais destinadas a poñer en coñecemento do público obxectivo a existencia das xornadas.

A referida achega por parte da Amtega é unha porcentaxe do importe total do proxecto e financiará exclusivamente unha parte dos custos do convenio, sen que a Universidade de Vigo obteña beneficio ou lucro ningún.

Cuarta.- Forma de pagamento e xustificación do convenio.

O pagamento da achega prevista por parte da Amtega na cláusula terceira do presente convenio realizarase previa solicitude da Universidade de Vigo e xustificación do desenvolvemento das actuacións levadas a cabo na súa execución. A tal fin, a Universidade de Vigo deberá achegar á Amtega a xustificación da realización das actividades previstas no convenio antes do 30 de agosto de 2023, na que se incluírá a seguinte documentación:

- a) Memoria xustificativa do cumprimento das condicións establecidas neste Convenio, con indicación das actividades realizadas, resultados obtidos e cifras relevantes das xornadas así como as accións onde se fixo figurar expresamente a colaboración da Amtega e do Nodo Galego de Ciberseguridade.
- b) Memoria económica xustificativa do custo das actividades realizadas que conterá:
 - 1º Relación clasificada, de xeito detallado, dos gastos atendibles para cada actuación. Para cada un dos gastos atendibles deberase describir o concepto con exactitude, indicando dun xeito claro e conciso o servizo ao que corresponderon, identificación do acredor e do documento, importe correspondente a cada servizo descrito, data de emisión e data de pago. Na relación clasificada a Universidade de Vigo deberá diferenciar os gastos atendibles que resultan cofinanciados mediante a achega da Amtega.
 - 2º Xustificación dos gastos atendibles: orixinais ou copias compulsadas das facturas ou dos documentos de valor probatorio equivalente no tráfico xurídico mercantil, ou con eficacia administrativa, incorporados na relación clasificada dos gastos.
 - 3º Nóminas pagadas, gasto de seguridade social e importes retidos en concepto de IRPF e certificado de dedicación emitido pola Universidade de Vigo da asignación das persoas ao proxecto. Para a imputación dos gastos de persoal ao proxecto, a Universidade de Vigo deberá realizar, con anterioridade á execución do convenio, a imputación de persoal propio ás actividades obxecto do convenio, indicando as porcentaxes de dedicación previstas, e así mesmo, na fase de xustificación, deixará constancia



documental das horas efectivamente consumidas polos traballadores/as imputables ao proxecto, explicitando as súas dedicacións horarias, en documento asinado polo responsable da entidade e a persoa empregada, e acompañada dos correspondentes partes de traballo.

4º Seguridade Social do período que se alega: Documentos/s de Relación nominal de traballadores e Documento/s de Cálculo da Liquidación e os correspondentes xustificante/s de pago.

5º Importes retidos IRPF do período que se alega: Modelo/s 111 e os correspondente/s xustificante/s do seu ingreso na AEAT.

6º Xustificación dos pagamentos: transferencia bancaria, certificación bancaria orixinal ou extracto de pagamento. Non se admitirán os pagamentos en efectivo.

7º Certificacións expedidas polas respectivas Administracións Públicas, que acrediten que se está ao corrente das obrigas tributarias e da Seguridade Social, así como a acreditación de non ter pendente de pagamento ningunha outra débeda, por ningún concepto, coa Administración Pública da Comunidade Autónoma ou autorización para que a Amtega realice estas consultas polos seus propios medios.

8º No caso de estar exento do imposto sobre o valor engadido (IVE), documentación acreditativa da mencionada exención.

9º Declaración da titularidade da conta bancaria onde se debe realizar o pagamento.

10º Xustificación, de ser o caso, doutros ingresos obtidos para financiar a actividade, non podendo superar o 100% do seu custo total.

- c) Un certificado que acredite a toma de razón en contabilidade de que se executou o obxecto do convenio e que as achegas das partes cofinanciadoras foron destinadas ao pagamento das actividades propias do convenio, xunto coa información detallada das actuacións realizadas e resultados obtidos.

En todo caso, a Xunta de Galicia e a Amtega resérvanse o dereito de solicitar toda a documentación que se considere precisa en relación coa realización das actuacións obxecto deste Convenio, e calquera outra que estime oportuna para a correcta xustificación do gasto e o seu pagamento.

Antes de proceder á sinatura deste convenio e para o seu pagamento, a Universidade de Vigo deberá presentar:

- Un certificado de non ter pendente de pagamento ningunha débeda coa Administración pública da Comunidade Autónoma de Galicia, expedido pola Consellería de Facenda e Administración Pública.
- Un certificado de estar ao día das obrigas tributarias, expedido pola correspondente delegación da Axencia Estatal de Administración Tributaria (AEAT).
- Un certificado de estar ao corrente das obrigas sociais, expedido pola Tesourería da Seguridade Social.

A sinatura deste convenio comportará a autorización á Xunta de Galicia para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia.



A Universidade de Vigo facilitará toda a información que lle requira a Xunta de Galicia ou a Amtega, así como a Intervención Xeral da comunidade autónoma, a Intervención Xeral da Administración do Estado, o Consello de Contas e o Tribunal de Contas no exercicio das súas funcións de fiscalización e control.

Quinta.- Comisión de seguimento.

Para a vixilancia, seguimento e control da execución do Convenio, así como para propoñer solucións e solventar as dúbidas que poidan xurdir na aplicación e interpretación das súas estipulacións, constituirase unha Comisión de Seguimento coa seguinte composición:

-Pola Amtega, a persoa titular da Dirección da Área de Infraestruturas e Seguridade, ou persoa en quen delegue.

- Pola Universidade de Vigo, a persoa titular da presidencia do centro de investigación atlantTic ou persoa na que delegue.

Esta comisión estará presidida pola persoa titular da Dirección da Área de Infraestruturas e Seguridade, ou persoa en quen delegue, que terá voto de calidade, e reunirse en tódalas ocasións que se estimen oportunas.

A comisión de seguimento manterá as reunións periódicas de seguimento das actividades realizadas que se estimen necesarias a petición de calquera das partes asinantes.

Sexta.- Vixencia

O presente convenio entrará en vigor na data da súa sinatura e terá vixencia ata o 15 de setembro de 2023.

Sétima.- Causas de resolución

O presente Convenio extinguirase polo incumprimento das actuacións que constitúen o seu obxecto ou por incorrer en causa de resolución. Son causas de resolución:

a)O transcurso do prazo de vixencia.

b)O acordo unánime de todos os asinantes.

c)O incumprimento das obrigas e compromisos asumidos por parte dalgún dos asinantes.

d)Por calquera outra causa distinta das anteriores previstas na normativa aplicable.

Se cando concorra calquera das causas de resolución deste Convenio existen actuacións en curso de execución, as partes, por proposta da Comisión de Seguimento, poderán acordar a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a liquidación das mesmas.



Oitava.- Publicidade

A sinatura deste convenio suporá o consentimento expreso do interesado á Administración para incluír e facer públicos os datos referidos ao convenio, de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 19/2013, do 9 de decembro (BOE 10-12-2013), de transparencia, acceso á información pública e bo goberno e co Decreto 126/2006, do 20 de xullo, polo que se regula o Rexistro de Convenios da Xunta de Galicia.

Novena.- Modificacións

O presente Convenio poderá ser obxecto de modificación cando teña como finalidade o logro dos obxectivos de estabilidade orzamentaria e sustentabilidade financeira. A devandita modificación terá por obxecto a redución do volume das obrigas ou a ampliación do seu prazo de execución.

Décima.- Protección de datos de carácter persoal

As partes asinantes comprométense a cumprir, en todo momento, as disposicións contidas na normativa básica estatal e autonómica que xustifica a lexitimidade do tratamento dos datos persoais e dos dereitos dixitais.

Na aplicación deste convenio respectaranse cantas esixencias establece o Regulamento UE 679/2016 xeral de protección de datos e a Lei orgánica 3/2018, do 5 de decembro (BOE 06/12/2018) de protección de datos persoais e garantía dos dereitos dixitais, adoptando cantas medidas resulten necesarias para cumprir as súas previsións e, en particular, para garantir a seguridade e integridade dos datos persoais e dos dereitos dixitais e, a súa protección fronte a alteracións, perdas, tratamentos ou accesos non autorizados.

Serán de aplicación todos os dereitos e obrigas derivados da normativa aplicable en materia de protección de datos e garantía dos dereitos dixitais.

Décimo primeira.- Inexistencia de relación laboral.

A subscrición do presente convenio non implicará relación laboral, contractual ou de calquera outro tipo entre os profesionais que realicen as actividades obxecto deste convenio e a Amtega.

Décimo segunda.- Propiedade dos resultados

A propiedade dos resultados obtidos como consecuencia da colaboración obxecto deste convenio corresponderán de xeito conxunto ás partes asinantes e, cada unha delas, poderán facer uso gratuíto destes co consentimento unánime das outras partes.



Décimo terceira.- Notificacións

1. As notificacións de resolucións e actos administrativos practicaranse só por medios electrónicos, nos termos previstos na normativa reguladora do procedemento administrativo común.
2. As notificacións electrónicas realizaranse mediante o Sistema de Notificación Electrónica de Galicia – Notifica.gal dispoñible a través da sede electrónica da Xunta de Galicia (<https://sede.xunta.gal>). Este sistema remitirá ás persoas interesadas avisos da posta a disposición das notificacións á conta de correo e/ou teléfono móbil que consten na solicitude para efectos de notificación. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.
3. No caso de persoas interesadas que, de acordo coa normativa básica, estean obrigadas a relacionarse a través de medios electrónicos coa administración, deberán crear e manter o seu enderezo electrónico habilitado único a través do Sistema de Notificación Electrónica de Galicia, para todos os procedementos administrativos tramitados pola Administración xeral e do sector público autonómico. En todo caso, a Administración xeral poderá de oficio crear o indicado enderezo, aos efectos de asegurar o cumprimento polos indicados interesados da súa obriga de relacionarse por medios electrónicos.
4. As notificacións por medios electrónicos entenderanse practicadas no momento en que se produza o acceso ao seu contido. Cando a notificación por medios electrónicos sexa de carácter obrigatorio, ou fose expresamente elixida polo interesado, entenderase rexeitada cando transcorresen dez días naturais desde a posta á disposición da notificación sen que se acceda ao seu contido.
5. Se o envío da notificación electrónica non fose posible por problemas técnicos, a Administración practicará a notificación polos medios previstos na normativa reguladora do procedemento administrativo común.

Décimo cuarta.- Natureza xurídica e xurisdición

Este convenio ten carácter administrativo e os seus efectos rexeranse polo establecido nas súas estipulacións, e quedará suxeito ao disposto nos artigos 47 e seguintes da Lei 40/2015, do 1 de outubro, do réxime xurídico do sector público.

Doutra banda, aínda que é un dos negocios xurídicos excluídos do ámbito de aplicación da Lei 9/2017, de 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, no non previsto aplicaráselle os principios recollidos na citada lei, co fin de resolver dúbidas e omisións que puidesen presentarse. Así mesmo, supletoriamente terase en conta o Decreto legislativo 1/1999, do 7 de outubro, pola que se aproba o texto refundido da Lei de réxime financeiro e orzamentario de Galicia e demais normativa vixente na materia.

A xurisdición contencioso-administrativa será a competente para dirimir as cuestións que puidesen xurdir da aplicación deste convenio.



E, en proba de conformidade, asínase o presente convenio no lugar indicado no encabezamento

O director da Axencia para a
Modernización Tecnolóxica de Galicia.

O Reitor da Universidade de Vigo.

Julián Cerviño Iglesia

Joaquín Reigosa Roger